

四庫全書

集部

欽定四庫全書

集部

弇州四部稿卷

四十九至五十二

詳校官侍讀學士_臣陸伯焜

中書_臣劉源溥覆勘

總校官原任中允_臣王燕緒

校對官中書_臣張塤

謄錄監生_臣張曾溶

欽定四庫全書

弇州四部稿卷四十九

明 王世貞 撰

詩部

七言絕句一百一十五首

蓬萊閣後六絕

東望鼉磯插漢高坐來峯嶼小秋毫不知雲霧連波長

漫道任公已釣鰲

其二

高城鐘鼓喚蒼茫
海若鎔波浴太陽
綺色中天徐散盡
空青一點是扶桑

其三

初月弓彎碧海秋
亂峯如鏃礙雲流
鮫人只訝秦皇至
使者還疑肅慎留

其四

不盡滄波返照紅
千尋霞錦蹙回風
中流忽迸真珠起

知是垂天飲白虹

其五

漢兵飛度下朝鮮
十萬旌旗鴨綠懸
烽戍祇今寒月色
可聞楊僕將樓船

其六

杖底秋風憶舊游
題詩應在閣東頭
長令風雨千山合
不逐星辰五夜收

寄致仕尚書山陰何公

嵇山別墅倚雲開
新放尚書天上回
客至不妨碁局賭
主恩還乞鑑湖來

戲為登州歌四章

空令小婦怨遠陽
只隔風煙一水長
不道天河纔咫尺
雙星夜夜永相望

其二

十三嬌小學搗箏
搗得箏如鸞鳳鳴
却問秦王何處去
不教童女訪蓬瀛

其三

約伴燒香海廟行就中商婦獨含情
由來海市惟看影恰似狂夫枉得名

其四

彈子渦畔水爭流小石星星滑似油
不惜紅裙裹將去與郎花下鬪藏鉤

單家橋贈楊柳

十五年前楊柳條輕陰綠遍單家橋
而今髮盡如僧老

却惟行人鬢早彫

代楊柳荅

秋來憔悴不關情
客鬢霜華枉見輕
一夜東風對吹却
請看何處綠還生

夜發廬溝有感

鷄鳴只傍五更長
瘦馬陵兢影自傷
一樣廬溝橋上月
不知南去便如霜

客談庚戌事

紅顏宛轉馬蹄間
玉筋雙垂別漢關
無限春風拋塞北
不教青塚徧陰山

晚春

漠漠殘花獨閉門
斜陽偏惹淚珠痕
閨人莫怨秋宵永
春日何曾不斷魂

聞王明輔將游趙

卧病聞君鄴下行
披衣推枕不勝情
漳河只作西來水
慷慨何人變羽聲

其二

梁王詞客有鄒枚苑雪千金一宴開何似蘭臺新賦就

碧天無際大風來

謂謝鄭

答李于鱗

鵲湖春雨暗青山流水桃花相對閒
共道閉門無外事不知清淚落人間

贈吏部張大夫助甫

紅羅綵繚不勝春昨夜承恩雨露新
行過桂宮休却扇

怕教愁殺尹夫人

其二

使者僂嵯切太虛長憐鮫室有人居自將清淚酬知己
不為君王十二車

秋思

庭梧一葉鴈初飛無那金河信轉稀
夜夜銀燈機裏盡
狂夫猶着去時衣

苦熱

今年毒熱不可過中夜狂走無時間即防蒸波徙漢浦
未有寒焰燒燕山

其二

北牕低庫不足眠河朔逃暑亦虛傳酒徒零落今已盡
即使相過無酒錢

其三

故知書齋如斗大青蠅白鳥仍相叅便論齷齪不足惱
徑欲點污令人堪

其四

交河層氷九千丈陰山積雪一萬年只今大地多暘死
汝休枉妬天公權

其五

青山一線接天門天坼銀河日夜奔千疊火雲低不度
野夫今夜夢崑崙

其六

欲陰不陰雲脚微安得橫吹海水飛共道驕龍會行雨

看他身向熱沙歸

其七

石家門前金欲流
石家別館如深秋
度盡清涼臺上月
玉人歌舞不教收

贈張二茂才

助甫弟

度門高枕避京塵
驚見秋風玉樹新
最愛謝家池草句
不知君是夢中人

答徐汝厚惠桑落酒

幾年罷郡無從事今日逢君有索郎
爛醉高眠秋色裏不知清夜傍誰長

漫興八首

海內猶傳何李詩三吳少年多度辭
莫將新調欺前輩弘治中天白日垂

其二

冥搜碧海珊瑚老細琢青春玉葉過
只自人間無白雪不知天上有黃河

其三

古人已往俱吞聲
眼底辭人縱復橫
何處衣冠無大歷
即論臺閣勝西京

其四

北地鹵莽不足傳
濟南拮据殊可憐
女曹輕薄莫相笑
回首西京落日懸

其五

世人魄奪宗生奇
武昌自誇節制師
解道孫吳祇水上

不愁難插漢旌旗

其六

少年書不破萬卷往往開口論千秋終南二華未挂眼
枉殺崑崙天盡頭

其七

野夫興就不復刪大海迴風生紫瀾欲問濟南奇絕處
蛾眉天半雪中看

其八

十年名挂齒牙間驅使風雲太不閒此日冥心還造化
他時只好施青山

荅史秀才臣紀見寄

一掬陵陽淚未乾投將明月畏途看還應捨放荆溪上
夜夜青天北斗寒

訪邵子弁是日以友人王太史聘入京不遇

蕭蕭寒雨叩柴關匹馬衝泥去不還倘遇故人留禁直
莫將詩句乞青山

為馮生走筆贈別楊都督二絕

早聞楊僕領樓船十萬旌旗曉色鮮
南粵東夷俱授首
斗來金印出甘泉

其二

大江春祖甲光寒匣裏吳鉤醉裏彈
幕下三千文武士
可無書記禮馮讜

走筆呈王使君

開府樓船十萬師旌旗搖曳海天移
風清月墮蓮香夜

唯有漁舟一葉知

其二

飽飯松風任意眠
晚涼移枕聽新蟬
江州鹵簿時時過
懶向人間乞酒錢

題李于鱗贈子與守汝南序後

風雨千林劍色分
中原吾黨漸離羣
莫言天上無推轂
總向青山領白雲

其二

曾將僊籍問三山次第安期與大還惟有吳郎渾未得
至今蹤跡在人間

贈長興鍾生

千金欲盡一身輕緩頰浮雲共此生醉裏論交醒後失
不妨秋色卧菰城

顧尚書有示山僧偈曰着意尋空未是空僧強余
和韻仍更為一轉語問僧不了吾義吾偈固空了
吾義吾偈又不空乎僧無語

着意尋空空未得若論空外本無空從教了却真空義
千樹桃花自在紅

重九日登高懷故人

頻年搖落伴風塵回首連枝淚滿巾今朝兄弟茱萸酒
却向天涯憶遠人

為謝道士題蘭卷

離離九畹暗香來讀罷玄經手自栽莫倚謝家庭內物
不知新種在蓬萊

客談李于鱗事有感

衡門秋色遠京塵
畏客時時稱採薪
莫為問奇容載酒
近來年少易窺人

寄張廣平助甫六首

自甘愚谷五經春
無限天涯草色新
縱有除書應懶讀
廣平還是折腰人

其二

當年宣室受釐開
絳灌如聞也愛才
三輔去天今尺五

何人解放賈生回

其三

蛾眉蕭颯不禁寒
青鏡流年懶自看
大有叢臺歌舞在
莫將行步怨邯鄲

其四

可隨桃李恨春風
曾是春風掌握中
千尺喬松萬年雪
不知天地為誰功

其五

愁聞平子賦歸田半刺翱翔亦可憐
老病束書黃犢角
不煩重數好文年

其六

雨色丹楓半掩扉
交游尺素漸來稀
無端最是隨陽鳥
只作青雲一處飛

題賓竹山房為李煉師作

千挺琅玕秋色新
清泉白石自為隣
阿猷元解吾家語
但過何須問主人

偶成

骨肉都盧業海中偶然相聚便生風何如學取龐居士
了却無生事事空

其二

三載寒廬夢不成悔將餘債伴殘生南樓酒力初微後
依舊蕭蕭夜雨聲

楊都督將解鎮賦二絕迎之

馬伏波書誰不惜杜征南傳世何知自從身掃鯨鯢後

湖海春風徧酒旗

其二

忽雷駁散紫花文明月
弓弦青海雲莫向瀾陵愁醉尉
何人不道李將軍

夏日村居雜興十絕

罷翻遺刻上烏絲
且捲湘簾看奕碁
猶覺閑身多此事
石牀眠受午風吹

其二

數卷殘編了不親科頭間作水邊身
恠來終日無煩暑
應趣人間得意人

其三

曉風微剪綠陰稠
剥啄柴門懶應酬
卿自衣冠用卿法
野人經月不梳頭

其四

風塵十載倦歸田
始向山僧學坐禪
此日和禪都不管
醒時呼酒醉時眠

其五

臞臞蒸餅甕頭春且喜農家事事真
論雨論晴天欲暝
柳梢初破月華新

其六

斷絕人間千萬緣尚留篇什伴殘年
欲知詩思今來懶
祇乞成都減樣箋

其七

草屨撈鰕寄此生早潮初退晚潮平
真成一夢真成覺

不博區區世上名

其八

落拓隗俄醉後真子嵩應的是前身自緣耽酒慵開卷
翻道莊生不異人

其九

日脚初低樹色高晚涼微動鬢蕭騷烏頭作風白頭雨
處處歡聲停桔槔

其十

池上疎星浴曙波
偶聽蛩響在青蘿
亦知殘暑將為客
其柰秋風感慨多

題竹贈沈山人

小徑初抽碧玉枝
澹烟零雨揔相宜
知君欲寫江湖色
懶向梁王賦夾池

病後承伴松虛白
二上人以法語見示輒成三絕
奉報

病起空庭秋色新
脩然一榻淨無塵
欲知不二門中語

應有朝來問疾人

其二

病來渾似墮尼連病去俄成自在天為語報身俱是幻
不知真境在誰邊

其三

勞師指示安心法欲覓心安總未能夜半披衣時自起
一庭殘月浸觚稜

題王子裕僉憲詩畫冊後

江東再見王摩詰寶界山頭即輞川一自丹青句題後
白雲秋色重蒼然

嘲梁伯龍

吳閶白面冶游兒爭唱梁郎雪艷詞七尺昂藏心未保
異時翻欲傍要離

酒品前後二十絕

內法酒出大官者嘗四叨燕賜及諸大璫所釀
亦近之雖似清美但或甘或冽多未得平飲之

令人熱及好渴不堪醉也

黃封銀甕出當筵側
并須防執法前
何似家園紅友在
一甌相藉柳風眠

桑落酒出關中名最古
色白鮮旨殊甚味宛轉
舌端不窮以甘故不可多飲

銀鉶初瀉玉生香
風味由來擅索郎
若比美人何所似
太真柔膩出蘭湯

襄陵酒出平陽襄陵縣
色黃白香醪而所致者

多過甘不堪醕獨趙兵巡齋兩甌味極殊絕累
白不厭以無甘味故也

消然甘露布松梢似玉如飴味更饒尚有碧霄真沆瀣
無將一滴貯天瓢

羊羔酒出山西汾州孝義諸縣白色瑩徹如水
清美饒風味遠出襄陵之上小挾羶氣耳

清心玉映五銖衣可是朱顏有愠羝為道皋蘭秋月下
流蘇帳底見明妃

蒲州酒清冽芬旨與羊羔並而不羶遠出桑落
襄陵之上特以遠故不易得

屑瓊為酒露為漿超出人間色味香應從帝女傳遺法

不向河東羨索郎

傳云儀狄帝女也禹時都蒲坂

太原酒頗清醇而不甚醲難醉易醒余嘗取其

初熟者以汾州羊羔劑半嘗之寫水晶杯不復

辨色清美為天下冠一時諸公嘖嘖轟飲至醉

未應誇詡和羹手偶向尊前壓獻酬他日邯鄲解圍後

與官求作醉鄉侯

潞州鮮紅酒蓋燒酒也入口味稍美易進而作劇吻咽間如刺或云即蒲萄酒遺法也

潞州城中酒價高胭脂滴出小檀槽華胥一去不易返漢使何煩種葡萄

薊州薏苡仁酒周氏第一成氏次之近得三屯營帥司所造當更勝絕蓋清冽秀美有出色香味之表者清芬一段出水壺為問天漿似也無莫恠死拋新息印

至今猶自勝明珠

後十年嘗之大不如矣

秋露白出山東藩司甘而釀色白性熱余絕不

喜之臬司因有改造終不能佳也惟德府王親

薛生者收蓮花露釀之清芬特甚第不可多得

耳

玉露凝雲在半空銀槽虛自泣秋紅薛家新樣蓮花色

好把清尊傍碧筒

章丘酒去濟南不百里清味雋永自是名勝而

人乃傳秋露何也謝少溪侍郎者佳

玉缸春色暖融融一點清泠便不同肯向邯鄲關穠艷
自誇林下謝家風

金盤露出處州佳在南品之上亦以不甘為難耳
空傳僊掌擘清霄似真珠寫小槽白露白雲都不要
溫柔鄉裏探春醪

金華酒色如金味甘而性純食之令人懣懣即
佳者十杯後舌底津流旖旎不可耐余尤惡之

欲沽春釀解春愁
爛漫華胥境裏游
無柰平原伴愁住
令人長自憶青州

高郵五加皮酒五加皮草藥能去風濕高郵人採
以釀酒因名有絕佳者然不可多得大抵亦病甘
甕湖酒綠如寒烟與君甕頭三日眠即使病醒不忍卻
況乃去病復延年

淮安酒有一種差佳曰苦蒿味近苦而冽世人
往往重甘良可笑也

漕河兩岸碧欄杆瀉出春缸琥珀寒任道儂家勝崖蜜
爭如橄欖有回甘

成都刺麻酒其法連糟置甕中中插一蘆管使
客遞吸之淺則加水至酒盡滿甕皆水也味不
能佳然往往令客至醉蓋眩於新奇耳

甕頭嘈嘈泣淚紅吸來應喚小郛筒何如換取蓮花柄
千載風流屬鄭公

麻姑酒出建章味多甘以穠郁為主尤在金華下

郵使遠將亦可憐
恠來瑟縮空流涎
麻姑縱有丹砂術
不作人間第一泉

池州酒色深而味甘
且釀土人極重貴
之余絕不喜飲

池州酒釀真如油
重碧穠甘瀉不流
故人要我酒家去
野夫自愛千金裘

蕩口酒范氏華氏以鶩肥
蕩水釀絕如菜竹色
而清旨爽冽醱之涼風生
齒咽間美而不醒南

酒第一也余嘗過其地醉者兩日

波如竹色酒如波勸客仍傾翡翠螺縱醉欲拋拋不得
教人無奈憶時何

顧氏三白酒出吳中大約用蕩口法小變之蓋
取米白水白麴白也其味清而冽視蕩口稍有
力亦佳酒也

顧家酒如顧家婦玉映清心劇可憐嗣宗得醉縱須醉
未許狼籍春風眠

靠壁清白酒出自家鄉以草藥釀成者斗米得
三十甌甌置壁前一月後出之味極鮮冽甘美
酒母啾啾怨夜闌朝來玉液已堪搏黃雞紫蟹仍肥美
與汝相將保歲寒

省坐無賴閱雜冊花草禽鳥凡十六色各成一絕
漫題其後

凌霄花

枝牽蔓轉葉紛紛數朵薦紅學出羣盤石托根君莫笑

只言身自致青雲

金錢花

日落千緡散漫垂
華清初浴太真兒
請看師相城西邸
應是河陽滿縣時

楊花

六代愁深金粉詞
一溪春漲麴塵絲
柔條已是無拘管
慚愧東風特地吹

薜荔

一片蒼岷萬古秋
高天翠色晚俱浮
自從謝傳東山別
未許交情到白頭

萍

洞庭天濶月橫斜
浪打風驚自嘆嗟
少日風光君莫問
至今情性似楊花

虞美人草

纔聽歌聲舞不休
楚宮猶記舊風流
相逢莫奏烏騅曲
腸斷秋江萬古愁

百舌

千迴睨睨復鷺丁不向東風自一鳴何似儂家卑脚鳥
此生長技自呼名

山鷄

莫恠殷勤學鳳皇祇因毛羽有文章騶虞已自新頒朔
平慮于今復拜郎

鵲

早過長信報平安晚向昭陽效合歡天上只誇頻送喜

不知雙翅落金丸

子規

絡緯喚織朝從暮布穀催耕雨復晴
汝道不如歸去好可將耕織了平生

鶴

引吭長鳴動九霄丹砂冠頂白雲翹
自從名喚僊禽後鰕鱖吞聲恨不消

白頭翁

嚴霜種種映顛毛莫更嫌人賦老
饕處處珍苞渾欲盡
可辭羅網入蓬蒿

鷓鴣

西山置網彌天去北極蒼鷹掠地來
日夜怨啼行不得
雄心一片已成灰

燕

曾逐東風入紫微晚拋江海滯烏衣
空誇萬里封侯額
還傍人家門戶飛

八哥

偶聽春聲牆外枝雕籠惆悵立多時
分明細語傳鸚鵡
摠為聰明欲怨誰

啄木

空林長日自敲訇一掃千章蠹盡清
聞道柏臺烏更好
不知何事但吞聲

弇州四部稿卷四十九

欽定四庫全書

弇州四部稿卷五十

明 王世貞 撰

詩部

七言絕句一百二十首

送張州守歸蜀

中丞汝明弟也

攀轅淚灑大河干
把酒毋歌蜀道難
倘遇賢兄京兆問
秋霜不改惠文冠

其二

五馬春風鬢尚玄
忽聞平子賦歸田
吳江豈是無馴雉
子午山頭響杜鵑

其三

挂冠歸去一身輕
瑤草華陽洞裏耕
僊令祇今多少在
丹成鳬鶴自來迎

其四

萬里橋下水連天
橋繫東吳萬里船
應有舊時松菊在

不妨杯酒傲霜天

寄明卿邵武四絕

樵嵐山頭雲欲飛
家家竹馬樵川磯
為道新年多氣色
樵陽太守拜恩歸

其二

十年車馬傍星霜
不向僊池憶鳳皇
高閣祇今題卧治

恠來長孺薄淮陽

吳有郡閣
扁曰卧治

其三

蛾眉一向掩秋塵
慚愧沾恩雨露新
拭淚暗將殘鏡照
玉顏還是舊時人

其四

海內居然七子名
莫教蹤跡擬王生
蓮花肯作干將色
身在光明藏裏行

松法師示微疾須陳米作粥侑以小詩

自是菴羅樹下身
現將微疾欲明真
莫疑香積盂中米
居士原來有勝因

郡城方戒嚴曉上人以疑被杖下獄作此慰之

豈有沙門蓄四兵空將四大施黃荊還他業後無餘事
身在四禪天下行

初夏屏居山亭與國手劉君對奕倦偶拈長慶集
得一絕句云紅旗破賊非吾事黃紙除書非我名
唯共嵩陽劉處士圍碁賭酒到天明時郡將以倭
警出師而劉君姓與事有相合者因戲書贈之仍
和二絕於後

角里先生無遠畧嵩陽處士有碁名若教兵法從君授
指點安危分外明

其二

自從拋却軍符後唯愛窮身不受名敲到半枰心便懶
夕陽閒坐小牕明

存沒口號十六首

徐比部以言

屈指中朝請劍年主恩明白賜歸田春來秦望山頭好

大有長安白日懸

汪中丞王卿

晚日論交汪玉卿揮毫彷彿見西京
沾沾白雪無前輩
寂寂青雲要主盟

梁比部公實

羅浮秋色妬歸田南海精靈南斗懸
遺藁一編王勃後
惟來男子可無年

吳中丞峻伯

海岱秋風送逐臣
尚留雙淚染征輪
自從金印能懸肘
肯數人間不利人

俞憲使德甫

一官纔顯復途窮
白簡無心也未公
聞道豫章秋色裏
蕭條歸索不禁風

張考功助甫

易水東頭廣柳車
看君殊似魯朱家
只今無限窮心在
羞澁雙龍匣裏花

魏濟南順甫

濟上諸侯才且賢能將玄草及生傳山人自愛名山好
不愛區區一世憐

李亳州伯承

李生官拙如潘岳健筆縱橫卒未休晚得一城如斗大
又教青綬在前頭

張僉憲肖甫

蜀中男子張君嗣曾共燕山作酒徒今日獨吟江水平

可能相為一愁無

廬山人少樵

十年城旦赭為衣
仍向侯門罵坐歸
死去只知文苑字
到來依舊識人稀

謝山人茂秦

黃河船畔曳裾人
轉眼東風萬事新
窮病布衣全似汝
只殘詩筆尚如神

徐憲使汝思

自拋符節請歸耕
腰下吳鉤解不平
忍死為名頻見囑
不知田叟久逃名

劉中丞子成

使君投筆走風塵
一戰黃金自統身
今日漢陰烟色裏
可無翻羨灌園人

張太僕有功

再厭承明鬢未蒼
翩翩濁世有張郎
生前無地容他酒
一死翻然俠骨香

許長史殿卿

梁園朝暮擁笙歌，猶有音情問薜蘿。
口囑去人無別語，不多飲酒讀維摩。

顧山人季狂

十勞鱗羽訪空山，莫恠裁書九不還。
布帽遮頭腰挂網，不堪名姓到人間。

贈淮陽中丞王公子虞入戶部六絕

十帆飛粟接天流，淮海長鯨一夕收。
收納取伏波金印去，

只教單拜富民侯

其二

桃花李花互爭新
柳葉柳枝俱路塵
唯有蒼虬自霄漢
不關霜雪不關春

其三

吳儂賽社乞年豐
更有豐年喜報儂
吳郡舊時賢太守
璽書新入大司農

其四

維陽佳麗古時名
桐柏江清到底清
贈取中丞壓載石
莫教青雀避風塵

其五

青天秀出南岷山
萬古長留白雪閒
聞道山頭山色改
欲施霖雨遍人間

其六

曾勞尺素訪青蘿
回首風塵感慨多
任是司空能候氣
不將孤劍傍星河

贈別吳子充

布帆猶帶楚雲寒
樽酒相逢桂未殘
明發又為千里別
故鄉今日是桑乾

戲贈華甥起龍

新郎玉潤眼中稀
五日嚴程便促歸
若使異時驅傳過
肯教回馬款柴扉

其二

莫將公禮惱田家
纔得三杯帽已斜
任爾文章能似舅

酒狂隨分減些些

小祇園六絕

隆福寺西新種竹
嘯雨縈烟幾萬條
野夫晝玩興未已
夜半來眠竹畔橋

其二

茅齋雨過秋雲鮮
一飽匡牀自在眠
不用經行與檀施
生來元是辟支禪

其三

藏經閣前四青松白雲頂宿根苔封自憐霜雪嘗應徧
依舊空山作卧龍

其四

綠楊斜館麴塵絲也解將情供別離欲識此中無染處
白蓮花在放生池

其五

夾浦芙蓉相映紅拒霜黃菊又叢叢總為窮秋費粧點
春來色相已成空

其六

清晨手寫一函經舍利毫端已似星但使有僧能過誦
不妨魚鳥共來聽

夜雨

酒力初消夢未成空階滴雨到天明不須身在陽關外
白髮應添四五莖

題陸山人募緣詩卷

人間豈少嘉賓在惆悵誰營剡下資何似只攜詩卷去

五湖烟雨伴鷗夷

調郭山人

回首蒼黃劒色分中原豪傑正思君自從追取青鞋去
且向吳山領白雲

題邵將軍海上戰功圖

吳鉤欲截海天流捷奏明光凱未收何事白茅能夜發
一言先拜富民侯

戲為舍弟題竹贈王生

阿猷到處徧尋汝為許相將保歲寒最是瀟湘一水外
乍晴乍雨耐人看

贈玉庵上人

少日經行晚坐禪曾教舌本吐青蓮而今一字無尋處
飽飯松風任意眠

山人戲為三空禪師云過去未來何勞子空子能
空一切見在乎師無荅山人代曰檀越饑否且吃
午齋去

誰云見在本來空門外猶青萬古峰薺菜乍香藜飯熟
留君且受午時供

慰伴松上人疾

長松葉底一繩牀瘦影凌兢額漸霜拋却此身誰受病
不勞三界訪醫王

陳生作大字用布帛隨手為之此法出江南李後
主號撮襟書生不知也

新裁犢鼻似相如祇合臨池興有餘年少莫談驚座事

幾人能愛撮襟書

病卧池亭丙夜起坐即景有感

畫卧虛堂夜起行朦朧斜月透疎櫺無端借得東隣水
一曲江州訴到明

其二

一溝流月碧潺潺翠竹蒼梧相對閒枕簟乍涼人似玉
可憐無夢到巫山

為秋野題畫

飄盡江頭蘆荻花疎疎黃葉見人家由他庾信能蕭瑟
社酒鷄豚樂未涯

瀘州蘇丈由夕拜謫丞吳江來署崑篆方著政聲
與余一見杯酒平生即席有黃陂新命因成六絕
句奉壯行色情見乎辭

才聞吳曲奏雲和忽倚征帆唱楚歌兩地春風試商畧
吳江爭似楚江多

其二

僊籍雖通未便收
蘇家舊例是黃州
金蓮一夜春風引
還向釣天夢裏游

其三

百徧行杯到手空
酒闌風雅自爭雄
前身敢道王摩詰
天下文章小許公

其四

欲將何物贈神君
縹渺峯頭一片雲
行過齊安倘為雨
却來秋雁好相聞

其五

蕭郎到處共僊班
婁水風烟一楫間
最是方城分掌握
行春同上鳳皇山

其六

與君相見即相憐
曾傍揚雄守太玄
千疊白雲千丈雪
不知何處是西川

史恭甫玉虛僊院

雕甍直上紫雲端
玉砌依稀太乙壇
元是柏梁供奉客

山中亦自領祠官

李程二生皆國手也同入張公洞視僊人局戲贈

一絕

還攜國手出人間洞裏雲封玉局閒却道僊家無歲月
誤他樵斧爛春山

出玉女潭逢一鶴甚秀而健啄李生與之鬪不勝

戲作

維山明月聽叅差一曲纔終到鳳池自是王家真騷裏

恠來凡骨不教騎

善權寺遇秀才

葫蘆酒暖急須傾
踏遍青山不問名
君自誤聽才子傳
當時別有一王生

出張公洞示沈道振

張公嶺頭無片雲
千奇萬恠此間分
丹青儻可形容處
丘壑胸中也仗君

毘陵月夜張子歌

城頭月出水曾光城外酒鑪黃柏香貪聽被郎歌宛轉
任教風露濕衣裳

吳門別李時養二絕

君為北客向南征我是南人暫北行陽鳥欲辭春燕至
那能不起故園情

其二

惟汝深杯百不辭夜央相對各淒其朱門酒肉應無限
誰解將情向別離

鳥聲

槐柳陰陰護帝城
春衫載酒愛流鶯
自是愁人聽作淚
不關能唱兩般聲

其二

林間姑惡無他語
只解將悲惱客眠
他生未斷無明盡

子午山頭作去聲杜鵑

其三

南風作雨北風晴
布穀朝來也勸耕
五湖三畝逃名地

不向人間擲此生

其四

朝來欲踏蹇驢出處處精藍覓酒僧空林一聲行不得
歸向空齋誦小乘

答寄延綏王中丞慎徵

中丞繡斧下青霄十萬軍聲靜不驚何限五原春草色
莫容代馬向秦驕

其二

北風吹墮五雲翰念我餘生傍釣竿三尺要離無左臂
祇留肝膽待君看

其三

十載南冠草莽臣至今猶愧脫驂人那堪一掬酌恩淚
半入漁陽半入秦

漁陽耿中丞
特相慰存

端午日小酌

榴花乳燕各爭新角黍蒲觴次第陳薦罷三閭還自笑
此生難作獨醒人

送濟南張生授侯門教讀還里

送君楊柳蒨門青
雨色能令紫馬停
莫訝蒨緌歌不起
橐中今是五侯鯖

其二

侯門正好曳長裾
暫擁雙旌過里閭
若到濟南人自識

少年曾受伏生書

伏生授書
濟南張生

聞命有感

還留上宰翊皇朝
天濶春風處處饒
自是清時寬去就

百年兄弟好漁樵

其二

空勞名姓玷公車萬死孤臣涕淚餘
但道不堪應過七可能先草絕交書

其三

敢從明世擬由巢窮骨由來怯漢貂
一寸酬恩心未死豈堪回施伯通橋

其四

一時真宰讓山公感舊能憐愁待中應是不經攀栢處
斷腸秋色滿霜風

其五

玉顏零落數經秋聽說承恩已自愁宮監滿前言不得
只將雙淚滴心頭

其六

北闕除書日日新肯留心事傍風塵城頭一片西山色
看盡人間得意人

贈蔡二戶部廣平人

九天春色散銅龍
黃紙年年免上供
芻粟如山揮不盡
君家兄弟領司農

其二

叅差鵷序進賢冠
不獨兄難弟亦難
解道溥沱饒紫氣
至今雙壁在邯鄲

李主簿攜具為別索詩

五陵車馬日翩翩
上客空勞玳瑁筵
欲覓阮家青眼去

只煩流水兩三絃

其二

與君今日混風塵
明發生涯各自新
何限吳山何限色
不將名姓借時人

別江上人

還將抖擻向風塵
一放聲聞酒入唇
莫笑野夫無所住
出山今是住山人

其二

門前紫馬踏青苔，
怨別新詩可更裁。
回首燕山當落日，
城頭一片碧雲來。

行抵平原而酒忽濁作此自嘲

使君虛忝舊青州，
無那平原有督郵。
解使璽書今夜至，
不教封作醉鄉侯。

旅店夜酌

塞驢秋色易黃昏，
糴米茅柴老瓦盆。
笑殺愁人周柱史，
偏將紫氣惱關門。

過江一絕

江豚吹浪浪花飛無數
征帆下釣磯饒他北固山頭色
不傲江南舊布衣

贈別王生

肘後刀圭倘見分
不須杯酒歎離羣
他時天眼如相覓
林屈峰頭生紫雲

生雙翳故
云天眼

其二

玉壺天酒號長春
五嶽金符字字真
若到緱山逢子晉

為言俱是姓王人

楚人劉司封父母

即看賢子領公車中壘傳經定不如莫恠紅顏長自若
淮南舊有枕中書

其二

司封封事九天開雲錦天書五色裁自是僊郎親捧致
不煩丹鳳為銜來

其三

幾度玄都鬢未華
武陵春事近堪誇
移將度索山頭種
來作桃源萬樹花

其四

白鹿銜芝度彩雲
巫山為鬢水為裙
何人得似劉綱婦
名姓雙教玉帝聞

輓金壇曹生生
今太史公愛子也
美秀而文弱冠
摧折余雖素昧顏
色頗辱神契陸汝
陳來徵薤露之章
因成五絕俾歌而
焚之墓

只解新詞入錦囊不知天上愛文章玉樓應是春光好
肯戀君家白玉堂

其二

高樓空自過雲新舩到南徐便愴神今日郝公門下客
始知強半為嘉賓

其三

空將汗血表楨符不見驂騑一過都刺有遺編數行在
九泉應自勝曹蜍

其四

勞君載酒蒜山傍
未許春風十日狂
一曲延陵歌作劍
白楊堆裏泣秋霜

其五

閨中雙筯夜流紅
架上千牙晝已空
聽罷丹陽垂老句
可能還作顧非熊

戚將軍贈寶劍歌

戚將軍逐賊至閩海
中夜半見赤光起波際
使

善沒者探之乃一古鐵猫也重可二百斤純綠
透瑩將軍素有中散之技因合閩中鐵絲髻煉
之凡百餘火以其半為刀八又重煉其半百餘
火為劍三俱作青色爛爛射眼一以自佩一贈
汪中丞一以遺余許為十絕句以謝揮筆便就
文不加點酒間歌之此劍當鏗然和我矣

暫脫將軍鐵柄當轆轤垂首匣無光十年俠血沾猶暖
不試燕然頂上霜

其二

鑄成胡冶笑相看
朶朶蓮花映日寒
自是君家第三劍
當年不遣贈來丹

其三

永夜清鉛淚自流
不從飛將取封侯
由來龍蹠山人曉
踏上瑤京十二樓

其四

毋嫌聲價抵千金
一寸純鈎一寸心
欲識命輕恩重處

灞陵風雨夜來深

其五

曾向滄流割怒鯨
酒闌分手贈書生
芙蓉澁盡魚鱗老
總為人間事漸平

其六

霜華出匣影迷離
懶傍商山刈紫芝
腰下長鑱來便妬
不須風雨論雄雌

其七

都督吳鉤月並懸中丞長缺字龍泉相逢莫道延津事
且誦莊生第幾篇

其八

虎丘山頭夜泊舟青鋒相為割離愁吳王墓裏三千劍
白虎于今不敢游

其九

螭頭銜玉虎絲絛白晝凌霜夜吼濤東海王生身漸老
可能酬得呂虔刀

其十

季狂耽酒勝馮謹醉裏侯門策懶千應為閩中魚價賤
未曾留借蒯緱彈

汪中丞戚都督道服訪余小祇園即事

不知何物兩道士來摘香臺石上霞瞥見毫端出獅子
還驚匣裏吐蓮花

其二

君將雙袖簫芙蓉予指孤雲伴碧松解道栖楣俱怖鴿

那知托鉢有垂龍

其三

藏經閣前風雨橫
獵獵梅花飛早春
却似脩羅初破日
滿天驚散玉龍鱗

其四

罷擁千帆截海濤
溪頭耐可弄魚舠
那輕芥子無多地
不論須彌萬仞高

調瞻美

自緣耽酒厭時名
數畝溪田手自耕
俱道鹿門多氣象
近來添得醉先生

弇州四部稿卷五十

欽定四庫全書

弇州四部稿卷五十一

明 王世貞 撰

詩部

七言絕句一百二十五首

李于鱗損餉諸物侑以新詩走筆為謝

西山石耳堪礪齒挾露過雲味更新莫恠殷勤相寄贈
只今誰是採芝人

右石耳

龍井儂分玉乳花
虎丘余剪碧瑤芽
何時踞坐松陰下
紗帽藤衫對品茶

右龍井茶

七尺蒼藤織寒玉
上有篴簫映眉綠
昨夜方牀小簟眠
却疑身在瀟湘曲

右藤障子

鸚鵡洲前欄客過
英魂磊砢墮江波
千秋一入高陽手

為問鷓鴣量較多

右鸚鵡杯

題李山風雪松杉圖卷二首

宋人為金
秘書監

撲地漫天卒未休
松杉千尺迴堪愁
丹青不作王孫草
老向冰天共白頭

其二

朝色葱蘢映碧虛
千峯瑤草漸凋疎
何當長白山頭樹
到了枝枝玉不如

泊高郵懷子相

廣陵東去是邗溝
斜日蒹葭黯未收
採就椒漿無處滴
不須聞笛也堪愁

薛子熙會予淮口有贈

清江欲盡見清淮
聽說南人便道佳
何處峭風吹會面
頓教明月挂離懷

其二

自是君才擬戴逵
手搜雞子刻新碑
江南螭首應無限

若個堪題幼婦辭

廣陵訪周公瑕不遇云自儀真失之

豪華自古讓維揚一水橫江卽異鄉二十四橋歌吹徧
不知何處覓周郎

其二

初聞相失在儀真怨水愁風且莫論道是使星還是客
教君難辨斗間人

過中山視故人趙叅議時廢疾者十二年矣

滿庭黃葉滿牀塵
摠為人疎鳥雀親
與說病身應莫恨
何人不是半殘人

其二

多買城南種秫田
匡牀擁被日陶然
真成四醉中山酒
不踏人間十二年

九日完縣署中

九月九日客衣單
風似并刀月似環
為問羽書臨鴈塞
何如杯酒醉龍山

其二

空庭吏散鎖楸梧不獨黃花事事無
最厭耳邊重九字
天涯兄弟各茱萸

食潯沱魚戲作

潯沱魚尾真全赤况復車輪敗後炊
三輔周遭二千里
從今魚樂也應知

娘子關偶成

夫人城北走降氏娘子軍前高義旗
今日關頭成獨笑

可無巾幘贈男兒

題馬嶺山中泉自潮蕪呈于鱗子與

圻峽分流各吐奇爭先翻道出山遲即令到海成何事
竟日行吟無倦時

井陘署中偶成

霜天盡日馬蹄間濁酒青燈未破顏好道使君厨傳薄
案頭長供太行山

阜平湯泉

玉乳潺湲蘭杜芳溫柔枉自別名鄉春雲若傍驪山足
肯作蓮花第二湯

其二

大荒西吐燭龍涎暗向中原地底穿兩乞君王湯沐地
酒泉嘗罷浴溫泉

其三

浴罷支頤坐自看五臺如案五雲端清涼燭盡人間暑
此水仍驅萬古寒

寄贈漳浦張封君

時乃子以水部治寧陽泉

閩海金波返照開一星南極傍三台君家天上張公子
曾向郎官宿裏來

其二

十二梁山青刺天寧陽七十二飛泉一泉一歲釀春酒
好致梁山張果前

其三

蜡湖春漲讀書堂紗帽膝衫坐隱囊總為新詩似何遜

山人今帶水曹郎

柏林寺

趙州城東古柏林趙州閣黎知我深究竟現應居士法
不須瓜蔓老婆心

謝萬曰忠并詢之

髭盡垂楊千萬枝又教冰雪擁皺皮不知生意猶存否
慚愧東風特地吹

其二

一唱天鷄海日紅中原曙色滿千峯無端更遇姑蘇客
依舊青山夜半鐘

其三

幕厯千林雨色中浮雲忽捲現長空欲知為雨為雲際
元是青天萬里同

其四

滄海那如性海澄此中無減亦無增祇憐拈破真乘後
依舊人間屬小乘

南和道中

流水灣環去馬遲
淡黃斜日印沙陂
楓人雖老稻孫少
不到江南應不知

還宮怨

阿監初傳喚故姬
六宮先已妬蛾眉
昭陽夜釐寒如水
元似增成奉帚時

其二

報道羊車指日臨
莫題紈扇罷悲吟
雙蛾欲畫仍教洗

恐負當年辭輦心

呂侍郎自製桑落酒絕佳以一甌見餉賦此為謝
并乞釀方

醖醕初綠豆花香穗勝河東舊索郎今夜五更殘月色
不須惆悵醉為鄉

其二

故園桑落霜風軟紫蠟黃甘事事豐乞得君家劉白墮
步兵明日下江東

別周公瑕

月明烏鵲動離愁
歌到周郎莫點頭
三竺六橋渾似畫
可能無意向杭州

別尤子求沈道振

二君皆善丹青

風軟波平天地寬
玉壺銀酎水晶盤
離筵好景俱堪寫
祇是歸鴻目送難

別瞻美弟

醉裏輕舸別惠連
醒時孤鴈泣江煙
不須論到池塘句

酒態如兄便可憐

別曹甥子念

虬鬚不分作山人却買林宗折角巾
莫倚新詩能似舅幾人如舅未全貧

別王復

吳船捩柁越舩催少選須傾三百杯
除却芙蓉池上酒幾家能見玉山頽

別李時養

勞君相送雲溪頭
雲裏風光事事幽
欲共一枰消永日
教人重喚李杭州

別張三

千觴不醉洗天亭
一曲汪倫最有情
不分游人明夜月
依稀拾得遠梁聲

又別諸君

尊前北斗漸闌干
領取清歌半刻懽
列棹迴波真自樂
一官行路未為難

贈虎跑泉庵良縉上人

虎跑閒居二十年可曾雙虎到茲泉
山神縱有皈依念其那山僧入四禪

見逐參方僧禁約戲成一絕

約束飛來峰去後便驅天竺舊胡神
閻浮未有三生籍若個人非行脚人

峴山有朋壽堂蓋為大司空蔣公劉公大司寇顧公築也已巳歲余與吳比部范太史嗣游焉吳與

余俱丙戌范丁亥因題一絕以為四十年左證云
霜色薰葭鬢共新倚來雙玉暫精神還因四十餘年後
朋壽堂中第二人

應黃州惠蘇長公墨跡却以一詩附還

研光藤紙墨華流欲報瑤瑤未敢收總為臨池貪玉局
可應遺翰去黃州

東行訪張伯起不遇飲幼于別館

柴門不啟白雲棲為憶君名未敢題何似竹林嵇叔夜

攜琴載酒夕陽低

其二

浮雲舒卷元無意
鶴怨猿驚未必真
贏得嗣宗心一片
不將青眼傍他人

華婿水部以事質余湖上小語竟別

白舫青門楊柳絲
湖中公事出偏遲
婆娑手板桓公府
應笑藍田晚更癡

其二

蕭蕭寒雨濕歸航
片語離尊味更長
此別應須不惆悵
衛郎無病到膏肓

酌六一泉為故茅學士書院

六一居士跡不到
千古人呼六一泉
爭信碧山茅學士
十年中夜枕泉眠

秋日官舍無事攜元白長慶集閱一遍題此二絕
句後置之篋中矣

十口官貧不遣隨
偶攜元白兩編詩
花犀欲角蠶將墮

莫病通天累色絲

其二

連翩逐客上皇都
三月中書片語無
不是通江少時謫
千年佳句一生孤

送陳生授經術吳中

知君經術自河汾
坐裏談鋒欲吐雲
到處虎皮應自徹
不須羔鴈詫成羣

嚴州有感

虛勞物色到羊裘
咄咄老翁何所求
一夜天能動星象
千秋人不改嚴州

有感

一株紅瘦隔天涯
珠箔深沈貼絳紗
欲賞清尊風雨隔
負他三月盡時花

其二

江南秋盡鴈初飛
應是深閨欲寄衣
別罷銀燈金剪澁
一雙紅筋隱寒機

塘栖道中得轉山西報自嘲

長河風雪舞孤舟興盡真成王子猷
塵世偶然那可料故鄉明日是并州

其二

薄祿風塵業未償除書一紙下錢塘
休言宦興生平薄已自將心度太行

用晦寄四種杯仍係以詩走筆二絕為謝

劉生自昔誇三雅何似君家四種杯
罰處已贏金谷數

飛時不怕玉山頽

其二

饒麓宣盃白於霜鸚鵡螺魚翡翠觴我欲按來成一鉢
大羅天上貯三漿

贈曹子念偕舍弟游燕三絕句

江南二月楊柳陰薊門雪花三尺深祇為和歌燕市好
不知臺上有黃金

其二

河東股肱吾倦游上書謁告行且休世上浮榮沾即厭
不將名姓托曹丘

其三

吾家才子謝惠連兼程攜汝薊門天薊門五侯不解識
何如乞取長瑜還

慎侍御子正借書

苔水穿階草滿除蕭然都似子雲居十年鉛槧頭堪白
又乞邢家未校書

中丞徐公追輓先君三章甫至舉寒食奠感嘆之
餘因成二絕奉報

楊柳搖青寒食新十年天地一傷春那知郢里歸魂句
元是南州絮酒人

其二

晝晴初解白楊哀忽地蕭騷暮響催不是隴頭春不到
西江風送薤歌來

戊午歲叔達甥兄弟弱冠應試余寄詩勉之曰玉

樹元雙挺鵠雛好並翻外家饒宅相若個魏陽元
又一紀而叔達文日益高有名然宅相猶未應也
今年春來別余應南京試復為一絕以促之

休將宅相問烏衣似舅如甥已自稀却月觀頭金粟樹
可能先折一枝歸

予方有乞休之請而日者凌生索詩遂成二絕

一官憔悴足藏名濁酒青山供此生到了自來還自去
鍾家錯畏管公明

其二

春朝中酒未曾醒
論吉論凶總不應
還却豸冠神武去
負他頭上貴人星

得宋搨右軍帖上卷絕佳而大令帖不至戲成一絕

箕裘誰復二王如
底事吳興一卷虛
記得向來貞觀例
黃金徧購右軍書

趙承旨為恭閣黎寫經畢以詩乞茶真蹟在余所

戲代恭荅

玉堂潤筆元無價珍重吳興祇換茶但使毫端吐舍利
一蒙山頂屬君家

題宋搢蘭亭記後

昭陵玉匣去人間定武皇孫未易攀留得雲仍隆準在
不教惆悵憶龍顏

題韓熙載夜宴圖

過雲歌罷舞迴風夜半腰支不屬公屈戌乍搖紗影弄

可應人是顧宏中

此圖乃李王遣宏中於韓家偷寫得者

其二

由來歌舞破江山
庭樹能催王氣殘
唱得浣溪宮樣句
小樓吹徹玉笙寒

其三

燒來紅淚盡
辭銀花擁舒郎別
院春國難家餽
都未了
可能還較絕
纓人

感興六首

白家柳枝不忍折韓家柳枝却復春爭似金明池上絮
隨風吹去作沙塵

其二

桃花片片委瀟湘棹入桃源轉斷腸懊恨義和排歷後
不教風雨屬東皇

其三

胡牀挂壁未曾收欲燼鑪香裊尚浮行到東廊纔一步
猛驚殘日上簾鉤

其四

峭風俄掃翦房空
恍忽還疑在夢中
畢竟怨親何所似
偶然萍水復西東

其五

欲酌仍停鸚鵡螺
酒醒長歎對銀河
傍人總會應難語
但道中年感慨多

其六

單車柳色太行新
濁酒寒燈供此身
燕趙向來多似玉

懶教人喚負心人

滁陽驛小飲戲作

兩三杯酒也成醉四十五年真是翁獨對瑯琊數峯坐
可將前號讓歐公

過清流關

層崖一道寫潺湲知是清流舊日關獨樹遙天挂霞色
尚疑飛將挾俘還

息陰樹傍冠塵俄重拂拭之餘聊用自解

欲將煩暑借風寬更起紅塵上鶚冠拭罷祇堪他日挂
不須留待故人彈

渡黃河偶成

銀作天河玉作隄河流倒挂與天齊可憐拋向崑崙頂
一到人間濁似泥

由寧郭抵新化鎮即事

陰溝清泚復灣環桃李成陰桑柘閒道是江南好風景
舉頭如戟太行山

其二

夾溪修竹帶青蔥，便擬移家住此中。
却憶鄉園渾未乏，不知何事厭江東。

初登太行迴望有思

千山立馬送斜暉，平楚蒼然色漸微。
最是東南欲盡處，黏天一點白雲飛。

臬署間居偶成二絕

道了放衙無一事，偶然馴鹿過庭除。
與君多少優閒在，

只是長林意未舒

其二

晉陽酒清絕可人午飲酣眠從至申
賴得長安信易達
知余懶病定為真

與張王二君彌陀寺小飲二君有惠政
吾郡時王
與余談禪而張旨在玄不甚答戲成三絕

一尊蕭寺鬢毛新
醉後那論主與賓
我夢未醒君夢覺
可能還喚夢中人

其二

參差棠樹五湖濱
福在人天慧在身
爭似懶夫窮徹骨
西方處處是迷津

其三

張君杜口為尊玄
王子縱橫豈離禪
任是法門吾不會
一杯還向炕頭眠

過亡妾殯所有感

絳羅長護曲闌干
樹底春花不覩殘
誰道殯宮荒壠畔

白楊吹送四時寒

其二

去辭華屋傍荒丘兒女呼孃不解求
任使破除情字盡也應饒淚到心頭

其三

衫羅襖彩縱橫疊胡粉胭脂滿鑑裝
處處精神新分例不曾聽喚第三房

其四

一尊澆罷自支頤是妾須歌薄命辭今日使君收涕後
藥鑪禪榻暫相隨

聞南中流言有感

時稍聞彈語

朝成嫫母昨夷光未必蛾眉一夜霜何似村中浣紗去
任他明月照空房

其二

累身元只是虛名損盡虛名事事輕折莫酒鑪禪榻伴
也能驅遣過殘生

其三

偶然文字落塵寰耐可爭名眼睫間側理細書三萬紙
自封雲檢施名山

其四

裁呼小草便無聞祇為慙他誓墓文若道長安車馬色
春風吹作五陵雲

瞻美有子兩月而夭走慰二絕

一枝蘭折委春煙聽說何人不解憐掌上明珠看似月

君家只得兩回圓

其二

莫言夷甫太鍾情情到東門強自輕留得藍田種時法
不愁無地出蕪城

偶題

許由能乞萬乘身歸卧箕山天地新過宿翻為竊屨客
飲流仍遇棄瓢人

題畫四首

千條楊柳弄如烟
漠漠輕陰好繫船
行到酒家須少住
莫教孤負杖頭錢

其二

秋老蒼山俱是骨
楓丹獨樹有餘姿
屋頭飛瀑挂不斷
興在忘言拄頰時

其三

千崖落木自蒼蒼
驢背看山了不忙
欲覓九秋無限色
從君叩取小奚囊

其四

青山綠樹香難分，忽斷中間是白雲。
欲買一椽深處住，不教名姓向人聞。

有懷莫雲卿時得所寄辭翰

香煤欲冷篆如絲，病起拈毫潤小詞。
忽憶莫家亭子畔，草生書帶墨為池。

其二

松江潮落見鱸魚，結就雙鯉不如魚。
最是莫卿新樣好，

開元詩句永和書

題錢叔寶臨大姚村圖

王孫自是真龍種
畫筆居然掩虎兒
何必大姚村下問
米家山色見應知

馮子潛將有廬山武夷之游索一絕句為贈

匡廬五老五白龍
武夷九曲九芙蓉
高秋贈爾青鞋去
踏破寒雲千萬重

暮秋村居即事

今年勝事屬田家報賽祈新樂未涯玉乳滴從香子糯
白雲裁作木綿花

其二

東家芙蓉夾清溪萬白千紅亞水低解使秋光不蕭索
老夫那惜醉如泥

其三

紫蟹黃鷄饒殺懷醉來頭腦任冬烘農家別有農家語
不在詩書禮樂中

其四

一醉隗俄轉任真東隣醒了又西隣從他白眼從他指
自信人間無此人

其五

隣莊愛弟乍移居竹裏清泉為洗厨裏餉欲殘喧鳥雀
斜陽拈出小粉榆

其六

不論鷄肋有無官但得年豐也自寬白紙喚將隨限了

皂囊何處教人彈

湯生裝潢為國朝第一手博雅多識尤妙賞鑒家
其別余也出古紙索贈言拈二絕句應之

鍾王顧陸幾千年賴汝風神次第傳落魄此生看莫笑
一身還是米家船

其二

金題玉躐映華堂第一名書好手裝却恠靈芸針線絕
為他人作嫁衣裳

題黃熊像

十年長泛米家船
詞畫嘗誇夙世緣
悟了去來無一物
不須身挂杖頭錢

傅伯雅園亭杜鵑花二絕

百花爭向傅亭開
獨有妖紅最後栽
不是錦江新樣錦
蜀妃魂挾楚雲來

其二

倦來真覺浪游非
愁見紅英浣素衣
若道此花真解語

也應相喚不如歸

弇州四部稿卷五十一